

# TIMOTEOMO PABLO NANO ORETAGA RABE

---

## Pablo Timoteona uaiduacino

**1** <sup>1-2</sup>Timoteo, bie carta omo cueticue. ¿Nigacino? ¿Nie isoidio? Pablocue. Cristo Jesús oretagamiedicue. Ie rafue llollena, naimie cuena orede Naimiena cue cioillena, naimie isoi cue illena, naimie abido billemo ocuiridicue. Jusiñamui cuena jiai orede. Naimiedi cai Jilloitaraima. Cue llofuiacinomona Cristona o raise inua jira, cue jito isoi cue mamecao. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiiaimai. Iena uiñocana mai o jai.

## Cristo rafuena tainona llofueraini llofuiacinodo jaiñeno

<sup>3-4</sup>Macedoniamio jaie jaidicue, Efesomo o fiebicaillena omo lloticue. Nainomo dajerie Cristo rafuena raise llofueñedimaci; iadedi jiaiforie llofuetimaci. Diga iigaiaina faca-facadimaci. Imaci usumatiai mamecido siadocabitimaci. Iemona conini uaina uaitaside. Jusiñamui jitailla isoi comini marena illana llofueñedimaci. Jusiñamuina cai inuamona, marena iticai. Iena llofueñedimaci. Ie jira naimaci uaina lliicaita. <sup>5</sup>Jusiñamuina comini isiruillena, jiaie cominina jiai naimaci isiruillena, Jusiñamui uaina llofueticai. Naimaci comeciai jeaninana jitaidicai.

Jusiñamuina raise naimaci inuana jiai jitaidicai. Ie jira Jusiñamui rafuena llofuecabiticai. <sup>6</sup>Dajerie llofueraini iese llofueñedimaci; iadedi jamai ñaitimaci. <sup>7</sup>Moisés micori jaie llogacinuaido llofueiacadimaci; iadedi iena llofuiana uiñoñedimaci. Naie llogacinuaina ua uiñoñedimaci.

<sup>8</sup>Iena raise llofuegana, Jusiñamuina uiñoñedinona naimiena uiñotallena, mare. Iena uiñotica. <sup>9-10</sup>Moisés micori llogacinuaidi mareuidinomo jainaiñede. Jiaínomio jainaiñede: Jusiñamui uaina inoñedinomo lloga uaina inorainidinomo, Jusiñamuina jitaíñedinomo, jeacino finorainimo, jeare ñaicabitinomo, Jusiñamuina enoidinomo, eina meinetinomo, moona meinetinomo, jiaie cominina meinetinomo, aiñede riño diga itinomo, iniñede iima diga itinaiñuaimo, daje isoide iima diga conini aifuedotinomo, comena fiidinomo, taino llorainimo, taino lluaana jifueridinomo, uanaí rafue facaisena inedinomo. Nana Cristo rafue facaina inedinomo Moisés micori llogacinuai ua jainaiñede; <sup>11</sup>ia naie rafue cuemo jai jainaiñede. Ie mare rafuena cue llollena, Jusiñamui cuena jai orede. Maremiena Jusiñamui illamona, naimie rafue jiai eo ebirede.

## Jusiñamui caina duenailla jira, Pablodi iobide

<sup>12</sup>Cuena fetua jira, cai Nama Cristo Jesúri iobidicue. Naimiena cue inollena,

naimie cuena uiñuamona, cuena fetode, naimie rafue cue lollena. Iena lollena, cue comecina jiai ocuiñotade. <sup>13</sup>Jaie naimiena jeare ñaiticue. Naimiena ñnotinona jiai duere finodicue. Abina cue uiñoñena jira, naie facaiseconi naimiena nia cue ñnoñena jira cuena duenaillamona, naimie cuena fetode. <sup>14</sup>Cuena eo duenaite. Iemona naimiena ñnoticue. Naimiena jiai isiruiticue.

<sup>15</sup>Bie lluadi mare cue uiñuamona, nana comini biena iinuana jitaidicue. Maraiñedinona naimaci jeacinomona jilloitallena, eniruemo Jesucristo bite. Ero, nanoca jeacinona finoraimadicue; <sup>16</sup>iadedi Jesucristo cuena duenaite. Naimiena cue iinuamo jaie fecuise ocuriride. Nana jeacinona finorainimo fecuise ocuriride, naimiena ñnollena. Naimiena cai iinuamona, Jusiñamui diga jaca iiticaí. Cuena duenailla jira, biruimona naimiena ñnotinodi naimie naimacina duenaillana uiñoitimaci. <sup>17</sup>Jusiñamuidi nanocamie. Jaca fiodañeite. Naimiena cionidicaí. Naimie damiede. Jiaiena iñede. Naimiena jaca iobicabillasa. Iena jitaidicue.

<sup>18</sup>Ero, Timoteo, cue jito, omo rafue lloiacadicue. Nano o llofueraimana jaiacana facaise ailluena Cristo rafuena llofuerañidi ona jaie llotimaci: “Naimie raise marena llofueite” llotimaci. Iena comecianona, o comeci ocuiñocana o jai, Cristo rafuena riidocana o jaillena. <sup>19</sup>Cristona ñnocana o jai. O comecina marena finocana o jai. Dajerie naimaci comeciaí iuaimo comeciaina facañedimaci. Ie jira Cristona jai ñnoñedimaci. <sup>20</sup>Iese ite Himeneo. Alejandro jiai jai daje isoide. Jai ñnoñediaimaiaí. Ie mei iaimaiaina Taife anamo jai itabicaítaticue, duere sefuillena. Iaimaiaí fueollena, Jusiñamuina jeare ñañellena, iese itabicaítaticue.

### Nana comini facaina jiiiticaí

**2** <sup>1</sup>Diga rafue omo lloiticue; iadedi daje rafue motomo ite. Nanoca rafue. Iena omo lloiticue. Jusiñamui diga omoi ñaia, nana comini facaina jii. Naimaciri iobillacinona Jusiñamuimo feca. <sup>2</sup>Uri cai illena, Jusiñamuina raise cai sedallena, Jusiñamui jitailla rafuena cai finollena, illaicomini facaina cai jii. <sup>3</sup>Iese cai jiiia, Jusiñamuimona mare. Naimiedi cai Jilloitaraíma. <sup>4</sup>Naimiedi nana comini naimaci jeacinomona jilluana jitaide. Uanaicinona naimaci uiñuana jiai jitaide. <sup>5</sup>Nana nairaiaí imaci Jusiñamuidi jaca dajede. Comini diga Jusiñamui facaisena ñairaíma jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaíma jaca dajede. Naimiedi Cristo Jesús. Naimie iimananona, comini facaisena ñairede. Ie muidona comini diga Jusiñamui jai nabairede. Jusiñamui diga comini jiai jai nabairedimaci. <sup>6</sup>Cai jeacinomona cai eneno illena, Jesucristo nana cai facaina jai fiodaite. Naimie jitailla facaiseconi Jusiñamuidi cominina bie rafuena jai uiñotade. <sup>7</sup>Bie rafue cue lollena, Jusiñamui cuena fetode. Judíuañedinomo cue lollena, bie rafue naimaci ñnollena, uanaicinona naimaci uiñollena, cuena orede. Tainona lloñedicue.

<sup>8</sup>Ie jira naga roracomo ite iñiaí, cai comini onolliaí a ñuitacabilla isoi, comeciaino jeacino iñenanomona, Jusiñamuimo jiiiana jitaidicue. Naimaci comeciaino icirillacino iñedemo, Jusiñamuimo jii. Naimaci comeciaino uaitajacino iñedemo, Jusiñamuimo jii. <sup>9-10</sup>Riñoniaímo jiai lloiticue. Roracomo omoi jaia, abi ieduamo comeciaina facañenamona, omoi ifotiena fino. Jamai ebinai raillano, abi ieduamona

abina finora jitañeno. Jamai ebinai raillano, abi ieduamona eo raifide iniroina jitañeno; iadedi mare rafuena omoi finuamona, ebinaitomoi. “Jusiñamuina iñoticaí” omoi raillanona, naimie jitailla isoi, marena omoi finolle. <sup>11</sup>Rollena comini ofia, ñaiñenanomona, uaitañenamona omoi fueo. <sup>12</sup>Omoi ofia, omoi iñiaina llofuiana jitañedicue. Nainomo omoi ñaiñena. iñiaí omoi anamo illana jitañedicue. Iese omoi riñoniaimo lloiacadicue. <sup>13</sup>Jusiñamui Adán micorina nano finua jira, iese lloticue. Adán micori finua mei, Eva micorina jiaí finode. <sup>14</sup>Taifedi Adán micorina jifueñede; iadedi Eva micorina jifue. Ie mei naie riño jeacinona finode. <sup>15</sup>Iemona jilloite; iadedi uruiái jococana jaite. Riñoniaídi Jusiñamuina iñoa, jiaie cominina isirua, Jusiñamui jitailla rafuena finoa, ie abina eenoa, jilloitimaci.

#### **Creyentiaína sedaraini illa rafue**

**3** <sup>1</sup>Bicinodi uanaicino. Creyentiaína llofueraimana bu jaiacania, naimie comecimo mare jitaillacino ite. <sup>2</sup>Bie isoide llofueraimana jaiacadimiena jitaidicue. Naga comini naimie mare raillamie. Dañaiñona airedimie. Abi eenotimie. Ebena iñedimie. iñogamie. Jiaie comini naimie jofomo riadedi, raise nafuecabitimie. Jusiñamui uaina raise llofuecabitimie. <sup>3</sup>Jifairuiñedimie. Fuirirainidimie. Raire icirirainidimie. Ucubena nicidoñedimie. <sup>4</sup>Naimie cominina raise sedadimie. Naimie anamo naimaci illanona, naimie uruiái ie uaina raise iñotadimie. Ie isoidimie llofueraimana jaillana jitaidicue. <sup>5</sup>Iese naimie iñenia, ie anamo itinona naimie raise sedañenia, ¿niese jiaie creyentiaína raise sedaite? <sup>6</sup>Como creyentena jaidimiena creyentiaína

llofueraimana fetoñeno, naie diga naimie abi iedoi raillano. Abi ieduamona, Taife isoi jeacino finoite. <sup>7</sup>Llofueraimana jaiacadimiena creyenteñedino: “Mare” raiñenia, naimiena fetoñeno. Iese naimiena raiñenia, naimie joreñona jeare ñaitimaci. Iemei Taife ramo jiaí faite, naimie abido danomo uaillena. Ie muidona naimie uaina jaca cacareñeñitimaci.

#### **Diáconuai illa rafue**

<sup>8</sup>Diáconuai creyentiaí llofueraíni isoi marena illa. iñouiganona illa. Jifairaiñena. Ucubena nicidoñena. <sup>9</sup>Naimacidi Cristona cai iñua rafuena jeanide comeciaimona iñua. <sup>10</sup>Bu omoi fetoacania, naimacina nano facaci. Roracomo jiaie rana nano maijita. Iena raise finoa, diáconuaina jaite. <sup>11</sup>Diáconuai ainiaí jiaí iñogañaiñuaina illa. Jiaie comini joreñona ñaiñena. Jirorainina. Naga rafuena marena raise finua. <sup>12</sup>Nana diáconuai aidi dañaiñorie. Diáconuai uruiái naimaci uaina raise iñua. Diáconuai imaci anamo itinona raise sedajana uiñua. <sup>13</sup>Diáconuai marena maijia, comini naimacimo iobillacinona fecaitimaci. Cristo Jesúna iñuano, naimiena marefodo jiaí lloitimaci.

#### **Jusiñamuina iñotino**

<sup>14</sup>Timoteo, raire o dine jaiacadicue; iadedi uicodo bie rafuena omo cueticue. <sup>15</sup>Are cue riñenia, dani omoi creyentiaí ñese ofia, Jusiñamui ie cominina marena omoi illana omoi uiñollena, omo cueticue. Cajede Jusiñamuina jai sedadicaí. Uanaicinona riidoticaí. <sup>16</sup>Jusiñamui caina Cristona jai uiñotagafuedi jiaie rafue baifemo faite. Iena cai uiñuanona, raiticaí: Eniruemo Cristodi iimana jai bairede.

Jusiñamui Joreñodi caina naimie  
uai siñonana uiñotade.

Jusiñamui jaienisai naimiena jiai  
ciodimaci.

Jiaie nairaiaimo naimiena lloticai.

Iena cacajamona, ailluena cominidi  
diga nairaimona naimiena birui  
iñotimaci.

Monamo naimie abido jai jaide.

#### Jjainodi jiaiforie rafuena lloitimaci

**4** <sup>1</sup>Jusiñamui Joreño caimo raise  
llote: “Jesucristo nia abido biñena  
facaiseconi damierie creyentiai Cristona  
fainonocaitimaci. Taiñe ðibeimo ite  
lloraini lluaana cacarefillamona,  
Janabamona ite llucacino jaitimaci.  
Taifemona ite llucacino jaitimaci”.  
<sup>2</sup>Naie llorainidi: “Uanaicinona lloticai”  
raitimaci; iadedi taino llocabiitimaci.  
Naimaci comeciai jai tainomo iite.  
<sup>3</sup>Hima riño ie aina ollena rairuitimaci.  
Riño ima ie inina ollena rairuitimaci.  
Dajerie guille rana fimaidoitimaci.  
Jusiñamui iena fimaidoñede; ia  
creyentiai uanaicinona uiñuanona,  
iobillanona guillena, naimiedi naga rana  
finode. <sup>4</sup>Nana Jusiñamui comuitaga  
guille radi mare. Iobillano iena cai  
feiuñuanona, guiticai. <sup>5</sup>Jusiñamui llua  
jira, Jusiñamuimo cai jiiia, nana guille  
radi jai mare. Iemona marañede rafue  
jaca caimo comuiñeite.

#### Jesucristo rafuedo raise iñocana jai

<sup>6</sup>Timoteo, cue lluaana creyentiaimo o  
lloia, Jesucristo ðibeimo raise maijidio.  
Cristo uaina iñocana o jailla jira, mare  
llogacino o jailla jira, raise maijidio.  
<sup>7</sup>Jamai rafuemo, jamai iigaiaimo o  
comecina facañeno; iadedi Jusiñamui  
jitaiilla rafuena finocana o jai.  
<sup>8</sup>Mairillena o abi llarocaiadedi, mare;  
iadedi Jusiñamui rafuena o facajia, eo

mare. Abi llarocaja baifemo Jusiñamui  
uaidi eo faite. Jusiñamui rafuedi o  
comecina birui ocuiñotaite. Jusiñamui  
dine jiairuido o jaillena, o comecina  
marena jiai raise finotaite. <sup>9</sup>Bie  
lluacinodi uanaicino. Ie jira iena cai  
iñua. <sup>10</sup>Cai jillobillena, cajede  
Jusiñamuimo ocuridicai. Ie jira duere  
sefuillano maijidicai. Jeacinomona  
Jusiñamuidi nana cominina  
jillobitaacade. Naimiena iñotinona jai  
jillotate.

<sup>11</sup>Nana creyentiaimo cue lluaana raise  
llofue. <sup>12</sup>Naimacina o llofueia,  
coniruena nia o illamona: “O afemo  
iticaí” naimaci raiadedi, damamai iese  
raitimaci. Mare illacino o jai. Ie mei  
iese raiñeitimaci. Marena o ñaiamona,  
marena o illamona, jiaie cominina o  
isiruillamona, Jusiñamuina o  
iñuamona, o jeanide rafuena o  
finoñenamona, naimacidi fueoitimaci.  
<sup>13</sup>O dine nia cue riñenia, creyentiai ofia,  
Jusiñamuina cuegafuaina ado faca.  
Iena llono. Iena llofue. <sup>14</sup>Creyentiaina  
llofueraini navui ofidemo,  
Jusiñamuimona o baitajacinona o  
feiuñollena, naimaci onolliai o ifogimo  
jonetimaci onolliai o ifogimo  
jonetimaci. Naie facaiseconi Jusiñamui  
naimacina naicinona ona llotatate.  
Naicinona birui fainonocañeno. <sup>15</sup>Iena  
eo uiuicai, nana comini Cristona  
iñocana o jaillana uiñollena. <sup>16</sup>O  
comecina raise eeno. Marena raise  
llofue. Cristo uaina iñocana o jai. Iese o  
jaia, jeacino finuamona jilloitio. Iese  
ona cacadino jiai jilloitimaci.

#### Timoteo afemo itino diga ie illa rafue

**5** <sup>1-2</sup>Eimiiaina illamona, o afemo  
itinona riire llofueño; iadedi o  
momo o llua isoi, naimacina fecuise  
llofue. O anafemo itinona o amataimo

o llua isoi, llofue. O afemo itinañuaina o eimo o llua isoi, llofue. O anafemo itinañuaina o miriñotiaimo o llua isoi, llofue. Naiñuaino jeare comecina facañeno. <sup>3</sup>Naiñuaina canollena, feciñuai comini iñenia, naiñuaina cano. <sup>4</sup>Feciñomo uruai ia, naimaci naiñuaina canua, naiñuaino naimacimo duilla jira. Einamacina illamona, iemona naiñuaino ibana oite. Iese itena, Jusiñamuimona mare. <sup>5</sup>Feciñomo uruai iñenia, da Jusiñamuimo naiñuaino ocuride, naimie naiñuaino canollena. Jusiñamuimo nagarui jicabite. Bie isoide feciñuaina cano; <sup>6</sup>iadedi Jusiñamuimo duiñede rana ebiruiga feciñona canoñeno. Jusiñamui anamo naiñuaino jai raise iñenamona, Jusiñamuimona naiñuaino jai fioidañuaino isoide. Fioidaite cominina jaca canoñedicaí. <sup>7</sup>Ie jira creyentiaimo biena llono, feciñuaina jeare bu ñai raillanona.

<sup>8</sup>Ie cominina canoñedimie Cristo uaina jai fainonocaide. Naimiedi Cristona iñoñedimie baifemo eo jearedimie. <sup>9</sup>Creyentiaina sedarainina canolle feciñuai mameciaina o joneia, iese jone: Jai jionaidiñuaino diese mameci jone. Dajede inrediñuaino mameci jone. <sup>10</sup>Mare rafue naiñuaino finocabilla jira, jiaie cominidi naiñuaino mareñuaino raillañuaino. Ie uruai raise sedañuaino. Cominina nafuecabiñuaino. Jai creyentiaina abina iedoño canocabiñuaino. Duidinona canocabiñuaino. Diese mare rafuena finocabiñuaino mameci jone. <sup>11</sup>Feciñuai diese mameci o joneia, nia jionañede feciñuai mameciaina joneño. Naiñuaino nano llotimaci: “Inina dane oñeiticai. Da Cristona sedaiticaí” llotimaci. Ie mei uri iñenanomona, iimana niciduamona,

inina jitaitimaci. Ie jira naiñuaino mameci joneño. <sup>12</sup>Naiñuaino navui llucinona jai fainonocaila jira, jiaie comini naiñuaino joreñuaina ñaitimaci. <sup>13</sup>Naiñuaino diga jofomo macariruillamona, rairaidimaci. Eo ñaillaredimaci. Naiñuaino ñañenacinuaino ñaitimaci. <sup>14</sup>Nia jionañede itinañuaino iese iñellena, naiñuaino inina dane uana jitaidicue. Ie mei uruaiñenitimaci. Naiñuaino jofona sedaitimaci. Ie mei budi naiñuaino jeare ñañeite. <sup>15</sup>Cristona dajerie fainonocaida, Taife dibeimo jai jaidimaci. <sup>16</sup>Creyente cominimona feciño iade, da naimie naiñuaino canua. Jiaie creyentiaimo naiñuaino canolle rana jicañena. Ie muidona cominide feciñuaina canorenitimaci.

<sup>17</sup>Creyentiaina llofuerañi marena maijia, raise ibauiga. Naimaci lloia, naimaci jiaí llofueia, eo raise ibauiga. <sup>18</sup>Moisés micori jiaie cufugai iena llote: “Trigo oni juillena jurareta saisia, ie fuena mañeno, ie guillena”. Guillamona ibana jai ote. Cristo jiaie llote: “Maijidiñuaino ibauiga”. <sup>19</sup>Creyentiaí llofuerañmana damie llogidoia, iena cacareñeno. Mena comini, ñibai daje amani comini iese naimiena llogidoia, iemo cacarei. <sup>20</sup>Creyentiaí llofuerañimona bu jeacinona finocabia, nana creyentiaí uicomo naimiemo riire llono, jiaie creyentiaí daje isoi iñellena. <sup>21</sup>Dacinodo naga jeacino finorañmamo llono. Nagamiemo riidoño llono. Fecuisse damiemo lloño, naimiedi o nabaina jira. Jusiñamui caina ciode. Jesucristo caina ciode. Jusiñamui fetoca jaienisai caina jiaí ciodimaci. Ie jira dacinodo llono. <sup>22</sup>Jeacino naimiemo ia, naimie jeacino facaisena o iñellena, creyentiaí llofuerañmana jaillena, buna raire fetoño. Jeacinomona oni eneno o i.

<sup>23</sup>Eo o duia, da jinuina jiroñeno. O duicabilla jira, janore vino jiro, o jebe manollena. <sup>24</sup>Jeacino dajerie finoia, iena uiñoticaí, juez isoi Jusiñamui iena nia lloñenia. Jeacino jiaíno finoia, iena uiñoñedicaí; iadedi jiairuido Jusiñamui lloia, iena uiñoticaí. <sup>25</sup>Ie isoide. Mare rafue bu finoia, iena uiñoticaí; iadedi birui iena cai uiñoñenia, jicarena finoñena jira, jiairuido iena uiñoticaí.

**6** <sup>1</sup>Jusiñamuina iinote maijirainidi naimaci patrones eo iinua. Ie mei Jusiñamuina iinoñedino Jusiñamuina jeare ñaiñeitimaci. Cai llofuiacinona jamaiñeitimaci. <sup>2</sup>Jesucristona naimaci patrones iinoia, maijiraini naimaci uaina jiaí iinua. Naimaci comeciaí facañena: “Patrón creyentena illa jira, dani conima cai isiruilla jira, raise maijiñeiticaí”; ia: “Raise maijiñeiticaí” comeciaina facaja.

#### Unaiñedicinona llucacino

<sup>3-4</sup>Cai llogacinodi uanaicino. Cai Nama Jesucristona lloticaí. Bie llogacinomona naimie jitaílle isoi cai illanona, raise uiñoticaí. Jiaicínodo bu llofueia, abi iedote. Abi uiñoñede. Uai eo uaitaiacade. Ie meinoconi comini abina uradoidimaci. Daajena comeciaina lloñedimaci. Jiaie comini jorefona ñaitimaci. Cai fiñena bitimaci. <sup>5</sup>Uai uaitatimaci, naimaci comeciaí maraiñeno illa jira. Uanaicinona jai uiñoñedimaci. “Cristo uai llumona, ailluena ucubena oiticaí” raillanomo comeciaina facadimaci. “Iemona caimare iiticaí” raillanomo comeciaina facadimaci. <sup>6</sup>Ie iadedi iese iñede. Cristona eo raise cai iinuamona, caimo diese ite ra diga caimare iticaí.

<sup>7</sup>Cai jeicia, jaca buenidicaí. Cai fiodailla mei, cai rana uiñeiticaí. Cai radi benomo fiebicaite. <sup>8</sup>Ie jirari, cai guille ia, cai iniroi ia, caimare bene cai illa. <sup>9</sup>Eo ucuberedinona jaiacadinona

Taife eo ramo faite. Taife uaina iinuanona ucube ollena, ucuberedinona jaiacadinodi diga maraiñede rafuena finodimaci. Ja muidomo imaci abi faifitimaci. <sup>10</sup>Ucubena ebruillanona, ucuberedinona jaiacadino naga jeacinona finocabidimaci. Ucube ollena, dajerie Cristona jai fainonocaidimaci. Ie muidona eo duere sefuidimaci.

#### Jusiñamui uaina iinocana jai

<sup>11</sup>Ero, Timoteo, odi Jusiñamui fetocamiedio. Nana cue como lloga rafuemona oni eneno o i. Mare rafuedo o jai. Jusiñamui jitaílla rafuena finocana o jai. Jesucristona iinocana o jai. Jiaie cominina isirui. Mare rafue dibeimo o comecina jone. Riicínodo cominina llofueño. <sup>12</sup>Jeacino dibeimo o iñellena, Jesucristona iinuanona, llocana o jai. Jaca itatajacinona marena raise iino. Jusiñamui ona fetode, o jaca illena. Navui diga cominimo Jesucristona o iinuana marefodo llotio. <sup>13</sup>Ie isoide Jesucristo. Poncio Pilato dine jiaie naimie itemo, marefodo: “Imiedicue” llote. Jusiñamuidi nana rana cajetade. Naimie caina jaca ciode. Jesucristo caina jiaí jaca ciode. Ie jira uanaicinona omo lloticue. <sup>14</sup>Cai Nama Jesucristo nia abido biñenia, nana omo cue llogacinuai iino. Jearede rafuena finoño, jiaie comini naie llogacinuaina uaitañellena. <sup>15</sup>Naimie jitaíllirui Jusiñamuidi eniruemo Jesucristona dane oretaita. Jusiñamuidi maremie. Nanocamie. Cai nanoca cai moto illaíma. Cai nanoca Nama. <sup>16</sup>Da jaca naimie fiodaíñeite. Eo isire lligaiñote ra ñinomo naimie ite. Nainomo jaca bu iaírei rinide. Bu naimiena jaca cionide. Naimiedi jaca siñonasa. Naimiemo iobillacinona jaca cai fecacabillasa. Iena jitaídicue.

<sup>17</sup>Eo ucuberedinomo lloño: “Abina iedoño. Ucubedi fuirede. Ie jira

ucubena uamo ocuriñeno; iadedi Jusiñamuimo ocuri”. Cai comeciai jaisillena, naimiedi caimo rana eo raise fecacabide. <sup>18</sup>Ucuberedinomo jiai llono: “Omoi ucube diga mare rafuena fino. Jiaie cominimo ucubena caidiñeno fecajana cano”. <sup>19</sup>Ie muidona iese naimaci finoia, monamo naimaci isiruiga rana iite, jiairuido iena. Iese naimaci jiaia, jaca itatajacinona marena raise ua uiñoitimaci.

### Fuiduacino

<sup>20</sup>Timoteo, cue omo llogacinona faiñeno raise uiuicai. Jamai rafuemo cacarefiñeno. “Uanaicinona eo uiñoticaí” dajerie raitimaci; iadedi uiñoñedimaci. Naimaci ñaiana cacarefiñeno. <sup>21</sup>Dajerie iena cacajano, Cristona nia uiñoñedimaci. Jusiñamui ona duenailasa. Jaca dinori omo rafuena lloticue. Mai. Pablodicue.